

為啥物無盡力？

Lín tiòh àn 耳孔來就近我；tiòh 聽，lín ê 心神就會活。我 beh kah lín 立永遠 ê 約，就是我應允 beh hō 大衛堅固 ê 恩惠。（《全民台語聖經》以賽亞書 55：3）

身為一個少年 ê 海軍軍官，我 tùi 「海軍核能之父」—海曼里克海軍上將（Hyman Rickover）收 tiòh 一張邀請函，請我去做工作面試。這位海軍上將是一個身材無 koân ê 猶太人，伊 tùi 波蘭來到美國；伊可能是有史以來 siōng 好 ê 工程師。伊是一個以嚴厲出名 ê 人，所以，我有 teh 擔心 chit-ê 面試。

伊坐 tī 一塊桌 á ê 後面，我坐 tī 伊面前 ê 一隻直椅 á。（我後來 chiah 知椅 á ê 頭前兩支腳有 hông 截短。）伊問我一個 koh 一個問題，我隨時發見，無論任何話題，伊知影 ê lóng 比我 khah chē；每一 pái，伊 lóng 會 koh 問一個我無法度回答 ê 問題。

最後，面試 beh 結束 ê 時，伊問講：「你 tī 安納波利斯（Annapolis）上課 ê 時，成績 án 怎？」我講我 ê 成績真好 ê 時，我吐一個輕鬆 ê 大氣。伊用冷眼看我，問講：「你 kám 有盡力？」我會記得，每 pái 我 ē-tàng 讀 koh khah chē 冊，á 是學習 koh khah chē ê 時，我卻顛倒去看小說 á 是聽音樂。我開始講：「是，先生。」，m̄-koh，最後我回答講：「M̄是，先生，我無 tiān-tiān 盡力去做。」伊看我真久了後，問講：「為啥物無？」然後，伊 kā 伊 ê 椅 á seh 向後面來結束面試。

我想講我已經失敗 ā，m̄-koh，後來伊有選擇我，來擔任 chit-ê 職務，可能是因為我有講實話。M̄-koh，我永遠 bē bē 記得這位海軍上將最後 ê 問題：「為啥物無盡力？」Chit-ê 問題改變了我 ê 性命。

基督為咱設立一個完美 ê 言行 ê 模範，而且祂今 á 日會問咱講：「你 kám 有 tiān-tiān 盡力去做？」Beh án 怎回答，是由咱每一個人來決定。

為啥物無盡力？

祈禱：上主 ah，我感謝古早以賽亞 chiah-ê 話。In 提醒我人生 ê 真理，koh 提醒我每工所做 ê 決定。求祢幫助我 kā in lóng 結聯做伙，koh 為我家已設立一個 tī 我 ê 救主—耶穌基督眼中 ē-tàng 接受 ê 超越 ê 標準，我奉祂 ê 名祈禱。阿們。
（2002.01.13）